

उपराज्यपाल मनोज सिन्हा होरें आखेआ जे जम्मू-कश्मीर च शानदार ते खुशहाल भविक्ख दी पूरी-पूरी समर्थ ऐ। एह संस्कृति दे केन्द्र दे तौर पर विकसित होइयै खुशहाल जम्मू-कश्मीर बनी सकदा ऐ। एह गल्ल उपराज्यपाल होरें जम्मू च नवरेह सरबंधी कार्यक्रम गी सम्बोधित करदे होई आक्खी। इस मौके पर बोलदे होई उ'नें आखेआ जे भविक्ख युवाएं पर निर्भर करदा ऐ। उ'नें युवाएं गी आखेआ जे ओह अपने पूर्वजें थमां प्रेरणा लैन ते जम्मू-कश्मीर गी अग्गे लेई जाने आस्तै पूरे धेय्यै कन्नै कम्म करन। उ'नें आखेआ जे युवाएं गी भारत दी विरासत गै अग्गे नेंई लेई जानी ऐ- सगुआं उसी नमां रुप देना ऐ ते विकास बाद्दे आहली भेठा बदाना ऐ। उ'नें आखेया.....(बाईट)

<><><><><><>

CM Delegations

मुख्यमंत्री उमर अब्दुल्ला होरें श्रीनगर आहले राबता दफतर च केंई सारे प्रतिनिधिमंडलें कन्नै मलाटी कीती ते उ'दी समस्याएं ते विकास सरबंधी मामलें गी सुनेआ। बक्ख-बक्ख क्षेत्रें दे नुमायंदें उ'दे कन्नै सार्वजनिक सुविधा, ढांचे ते लोक कल्याण दे मामले पुट्टे। मुख्यमंत्री होरें सब्बनें दे जायज मसलें दा समें-सिर हल करोआने दा भरोसा दोआया। उ'नें अफसरें गी हिदायत कीती जे ओह फौरी कार्रवाई करन ते नीतियें दी अमलावरी यकीनी बनान तां'जे लोकें दी भलाई-बेहतरी, पारदर्शिता ते पूरे-पराते विकास प्रति सरकार दी वचनबद्धता यकीनी बनी सकै।

<><><><><><>

Satish Market Drive (Byte)

उपभोक्ताएं दे हितें दी हिफाजत करने आहली इक महत्वपूर्ण गैस तैहत खुराक, नागरिक आपूर्ति ते उपभोक्ता मामलें दे मंत्री सतीश शर्मा होरें कटरा थमां जम्मू तगर बक्ख-बक्ख थाहरें बजारें दा जायजा लैता। इस दौरान उ'नें रसोई गैस दी बंड ते उपलब्धता पर बी खास तवज्जो दिती। उ'नें केई सारे LPG गौदामें दा चानचक्क दौरा लाया ते भंडार दा निरिक्षण कीता ते बंड ते कीमत आहले सरिस्ते दा बी जायजा लैता। उ'नें लोकें गी भरोसा दोआया जे LPG दा लोड़चदा भंडार उपलब्ध ऐ ते सरकार एदे पर नेड़मी तक्क रक्खा'रदी ऐ। मीडिया कर्मियें कन्नै गल्ल करदे होई उ'नें आखेआ.....(बाईट)

<><><><><><>

Census Training

रियासी च समाज कल्याण विभाग नै घरें-मकानें गी सूचिबद्ध करने ते इंदी गिनतरी बारे जानकारी हासल करने सरबंधी अभियान दे पैहले गेड़ लेई इक बड्डा सिखलाई कार्यक्रम रम्भेआ ऐ- जेहदा मकसद सरबंधत अधिकारियें राष्ट्र-व्यापी मुहिम लेई त्यार करना ऐ। इस दरान सरबंधत प्रभारी अफसरें, SDMएं ते मरदमशुमारी आले क्लर्के गी घरें-मकानें दियां सूच्यां त्यार करने ते घरें, सुविधाएं, सम्पत्तियें ते ढांचे वगैरा बारे आंकड़े किट्ठने करने मतल्लक सिखलाई दिती गेई। एहदे इलावा प्रतिभागियें गी डिजिटल उपकरणें, मोबाईल एप्लीकेशनें ते अपनी गिनतरी आपू करने सरबंधी पोर्टल बारे बी मार्ग-दर्शन दिता गेआ। वरिष्ठ अधिकारिएं सिखलाई हासल करदे प्रतिभागियें गी आखेआ ऐ जे ओह पूरी सावधानी कन्नै अपनी जिम्मेदारियें गी तोढ़ चाढ़न।

<><><><><><>

JMC Water Bills

जम्मू म्युनिसिपल कारपोरेशन नै शैहर भरै च इक जागरुकता मुहीम शुरु कीती ऐ- जेदे तैहत बसनीकेँ गी अपील कीती गई ऐ जे ओह 31 मार्च थवां पैहले-पैहले अपने पानी दे बकाया बिल जमा करोआई देन। जम्मू नगर-निगम दे आयुक्त डाक्टर देवांश यादव होरें जल शक्ति मैहकमे गी हिदायत कीती जे ओह लोकेँ दी सुविधा लेई 12 शिवर कायम करन। एह शिवर रुपनगर, जानीपुर, कुंजवानी, त्रिकुटा नगर ते छन्नी हिम्मत च बी कायम होने लोइचदे। अफसर इस दौरान लोकेँ गी सहायता उपलब्ध करोआ'रदे न। लोक मौके पर गै बिल जमा करोआ'रदे न ते लोकेँ दियेँ समस्याएं दा बी हल होआ'रदा ऐ। करीबन 30 करोड़ रपे अजे बकाया न।

<><><><><><>

ते हुंन बाकि दिएँ खबरें कन्ने विजय बजाज:-

<><><><><><>

SMVD Shrine Pilgrims (Byte)

बरखा ते ज़बरदस्त ठंडु दे बावजूद ज्हारां बद्दे श्रद्धालुएं कल “चेतर नरातेँ” दे पैहले दिन श्री माता वैष्णो देवी जी दे दरबार च मत्था टेकेआ। श्राईन बोर्ड ते प्रशासन आसेआ कीते गेदे व्यापक प्रबंधें तैहत जातरा बवस्थित ढंग्गै नै चला करदी ऐ ते तकरीबन 15 ज्हार श्रद्धालुएं माता वैष्णो देवी जी दे दरबार च हाज़िरी लाई। श्रद्धालुएं लेई सुरक्षा, RFID ट्रैकिंग, साफ-सफाई, खाने-पीने ते मैडिकल सेवाएं सनेँ सब्बै लोइचदे बंदोबस्त कीते गेदे न। मेद ऐ जे 20 शा

30 जहार श्रद्धालु नरार्ते दरान हर रोज माता वैष्णो देवी जी दे दरबार च पिंडी रूप दे दर्शन करगंन। किश श्रद्धालुएं इस बारे अपने तुजुर्बे सांझे करदे होई आखेआ.....(बाईट)

<><><><><><>

Dy. CM Brotherhood (Byte)

उप-मुख्यमंत्री सुरेन्द्र चौधरकी होरें आखेआ ऐ जे जम्मू-कश्मीर आपसी भाईचारे दी शानदार मिसाल ऐ- जित्थे बक्ख-बक्ख समुदायें दे लोक किट्ठे रौहन्दे न ते त्योहार रलि-मिलिये ते आपसी सोहार्द कन्नै मनांदे न। बावे आहली माता मंदर च मत्था टेकने मगरा मीडिया कर्मिये कन्नै गल्ल करदे होई उ'नें खिते दी सांस्कृतिक बन-सब्बनता ते इक-दुए प्रति लोकें दे सम्मान आहली भावना दी सिफ्त कीती। उ'नें आखेआ जे नेयां आपसी सोहार्द समाजी ताने-बाने गी मजबूती दिंदा ऐ- शांति गी बढ़ावा दिंदा ऐ ते प्रगति आहली पेठा लेइयै जंदा ऐ। इस मौके पर बोलदे होई उ'नें आखेआ.....(बाईट)

<><><><><><>

Snowfall Tourists (Byte)

जम्मू-कश्मीर दिये केंई सैलानी थाहरें पर ताज़ा बर्फबारी दे चलदे सैलानिएं दे चेहरे खिड़ी उठे दे न। कठुआ जिले दे बनी इलाके च सैलानी बर्फबारी दा नंद लेंदे होई कुदरती नज़ारें दा बी लुत्फ ठोआ करदे न। तोंआई श्रीनगर दे मशहूर ट्यूलिप गार्डन च बड़ी मती गिनतरी च सैलानिये दा औना बरोबर जारी ऐ। मकामी प्रशासन नै सैलानिये गी गुजारश कीती ऐ जे ओह सुरक्षा सरबन्धी दिशा-निर्देशों दी पालमा करन। मेद ऐ जे सैलानिये दी आमद कन्नै सैलसफा ते मकामी

अर्थबवस्था गी बड़ा मता बढ़ावा थहोग। इस सरबंधै च अपने अनुभव सांझे करदे होई इक सैलानी नै आखेआ.....(बाईट)

<><><><><><>

Weather

मौसम विभाग दी जानकारी मूजब जम्मू-कश्मीर च अज्ज बी मौसम खराब रौहग। उच्चिये धारे पर कल उप्परोतली 5में ध्याड़े बी बर्फबारी ते पदरे इलाके च बरखा करी तापमान च बड़ी मती गिरावट दर्ज कीती गई ऐ। जम्मू शैहरा च बद्दोबद्द तापमान 20 इशारिया 2 डिग्री सैल्सियस दर्ज कीता गेआ- जिसलै के बनिहाल, बटोत ते भद्रवाह च बी हौली शा दरम्याने दर्जे दी बरखा करी तापमान, सामान्य कोला हेठ रेहा ऐ। प्रदेश दिये मती सारी थाहरे पर अज्ज बी मौसम बदलोखड़ा बने दा रौहग ते केई थाहरे पर हल्की थमां दरम्याने दर्जे दी बरखा जां बर्फबारी होग। चिनाब घाटी दे उच्चे पहाड़ी इलाके सनें दक्खनी कश्मीर च अज्ज भारी बर्फबारी होई सकदी ऐ। तौंआई जम्मू खिते दे केई हिस्से च गरज-चमक कन्ने बरखा बरने, अंधी-झक्खड़ झुलने ते ऐन-गड़ा पौने दे असार दस्से गे न।

<><><><><><>